



伴

食飽朝，一屋人走淨淨，讀書个讀書，上班个上班，歸屋下斯伸偈一儕，恬索索仔，實在孤栖。一儕人無落無著，亭杯茶，坐啊下來，偈个細狗子「毛毛(mauˋ mauˋ)」黏皮就走過來，坐在偈个腳脣，佢一頭舐偈个手，一頭用佢金金个目珠看等偈，偈摸摸佢个頭那，摺佢講講話，退休後个日仔有佢做伴還好。

熱燂燂个天，歸隻人懶甥甥仔，連「毛毛」就在電扇下睡到四腳惹天，無睡慣當晝个偈，長下用這難得个清閒來看本書。下把仔，跔等書肚个情節，一下歡喜、一下悲傷，看盡世間个是非善惡；下把仔，跔等作者个腳步，一下上山、一下下海，欣賞世界各地个風土人情，偈就係書肚个主角，書肚个主角就係偈。熱到心煩意躁个時節，偈也長下會聽聽音樂，柔柔个音樂聲，像清泉、像流水，安定偈煩躁个心神。這兜書摺音樂係偈最好个伴，豐富偈个人生，寄託偈个感情，陪偈行過孤單个日仔。

「你在屋下等，加成十分鐘就輪著接你咧。」電話該頭傳來好朋友个聲音。這日係偈恁多個老朋友聚餐个日仔，偈五儕，從小學認識到這下，有幾下十年个交情咧，雖然大家戴在無共樣个縣市，雖然儕儕有家有寶，毋過恁多年來，一、兩個月總會尋隻時間見見面、食食飯、打打嘴鼓。心肝肚有麼个委屈，老朋友會互相安慰；遇到麼个困難，老朋友也會搵手解決。一路行來，有這兜朋友做伴，心就寬、膽就大、腳步就在，無麼个事情解決毋得。

當然，屋下人逐日在身邊，係偈最親密个伴，毋過，細人仔大後个「空巢期」，夫妻就變成最重要个伴咧，人講：「少年夫妻老來伴。」確實有影。但係，一個人斯兩公婆共下做伴，在這下个社會還係會感覺著孤獨，培養一兜興趣，結交一兜心性相近个朋友來做伴，正毋會變成孤單、寂寞个人。

作者：張美容

☆詞彙學習☆

- 【熱燂燂】ngiedˋ fogˋ fogˋ：形容天氣炎熱。 【有家有寶】rhiuˋ gaˋ rhiuˋ deuˋ：有家室。
 【懶甥甥仔】nanˋ guaiˋ guaiˋ er：意興闌珊。 【腳步就在】giog pu+ ciu+ cai+：腳步穩穩的。
 【四腳惹天】siˋ giog ngiaˋ tienˋ：四腳朝天。 【心性】simˋ siangˋ：本心、性情。

☆文法學習☆

- 【走淨淨】zeuˋ ciang+ ciang+：跑光光。動詞後綴重疊的 ABB 式構詞，為「動詞+補語」的結構，表示動作行為達到某種程度、結果，中間或可插入「到」，補語的重疊則帶有強調的意味。「走淨淨」海陸腔通常會音變讀成 zeuˋ ciangˋ ciang+。
 例 1：這盤菜一下仔就分大家食淨淨。(這盤菜一下子被大家吃光光。)
 例 2：講著愛做事，佢就行遠遠。(說到要做事，他就走得遠遠的。)